



**ЎЗБЕКИСТОН РЕСПУБЛИКАСИ АДЛИЯ ВАЗИРЛИГИ
ОЛИЙ ВА ЎРТА МАХСУС ТАЪЛИМ ВАЗИРЛИГИ
ХАЛҚ ТАЪЛИМИ ВАЗИРЛИГИНИНГ
ҚАРОРИ**

**Ёшларда коррупция ва бошқа ҳуқуқбузарликларга қарши
мурасасизлик туйғусини шакллантиришга қаратилган
иншолар танловини ўтказиш тўғрисида**

Ўзбекистон Республикаси Президентининг 2019 йил 9 январдаги ПФ-5618-сон Фармони билан тасдиқланган Жамиятда ҳуқуқий маданиятни юксалтириш концепциясини 2019 йилда самарали амалга ошириш бўйича “Йўл харитаси”нинг 22-банди ижросини таъминлаш мақсадида Ўзбекистон Республикаси Адлия вазирлиги, Олий ва ўрта махсус таълим вазирлиги ҳамда Халқ таълими вазирлиги қарор қилади:

1. Қуйидагилар:

Ёшларда коррупция ва бошқа ҳуқуқбузарликларга қарши мурасасизлик туйғусини шакллантиришга қаратилган иншолар танловини ўтказиш тўғрисидаги низом 1-иловага мувофиқ;

Ёшларда коррупция ва бошқа ҳуқуқбузарликларга қарши мурасасизлик туйғусини шакллантиришга қаратилган иншолар танловини ташкил қилиш бўйича Республика ташкилий қўмита таркиби 2-иловага мувофиқ;

Ёшларда коррупция ва бошқа ҳуқуқбузарликларга қарши мурасасизлик туйғусини шакллантиришга қаратилган иншолар танловини ташкил қилиш бўйича ҳудудий ташкилий қўмиталарининг намунавий таркиби 3-иловага мувофиқ тасдиқлансин.

2. Ўзбекистон Республикаси Адлия вазирлиги, Олий ва ўрта махсус таълим вазирлиги ҳамда Халқ таълими вазирлиги 3-иловада келтирилган намуна асосида ҳар йили август ойининг 20 санасига қадар тегишли ҳудудий ташкилий қўмиталари таркибини тасдиқласин.

3. Ўзбекистон Республикаси Адлия вазирлигининг Ҳуқуқий тарғибот ва маърифат бошқармаси Республика ташкилий қўмитасининг, Қорақалпоғистон Республикаси Адлия вазирлиги, вилоятлар ва Тошкент шаҳар адлия бошқармаларининг Ҳуқуқий тарғибот ва маърифат бўлимлари ҳудудий ташкилий қўмиталарнинг ишчи органи этиб белгилансин.

4. Қайд этиб ўтилган танлов ҳар йили анъанавий тарзда сентябрь-декабрь ойлари давомида ўтказилиши белгилансин.

Бунда танлов натижалари бўйича якуний тадбирлар, хусусан тақдирлаш маросими қоида тариқасида “9 декабрь – Халқаро коррупцияга қарши кураш куни” арафасида ўтказиб борилиши назарда тутилсин.

5. Ўзбекистон Республикаси Адлия вазирлиги, Олий ва ўрта махсус таълим вазирлиги, Халқ таълими вазирлиги ҳамда уларнинг ҳудудий бўлинмалари қайд этиб ўтилган танловнинг ўз вақтида ва сифатли ўтказилиши учун бир хилда масъул эканлиги белгилаб қўйилсин.

Танлов доирасида қуйидаги вазифа ва тадбирларнинг амалга оширилиши таъминлансин:

тегишли ташкилий қўмиталар ва ҳайъатлар таркибига аъзо сифатида киритиш учун ўз мутахассисларини ажратиш ҳамда ушбу мутахассисларнинг уларда тўсиқларсиз иштирок этишини таъминлаш;

тегишли ҳудуддаги барча таълим муассасалари ўқувчи ва талабаларига танлов билан боғлиқ маълумотларни етказиш ҳамда бунинг учун барча воситалардан фойдаланиш (оғзаки ва кўргазмали шаклда ҳамда ОАВ (матбуот, радио ва телевидение) ва ижтимоий тармоқ орқали);

ўқувчи ва талабаларнинг танловнинг барча босқичларида таълим жараёнларидан узилмаган ҳолда фаол иштирок этишига қўмаклашиш;

танлов учун иншоларни ёзишда ҳар бир иштирокчининг ўз шахсий қарашларини мустақил баён этиши ва турли шаклдаги кўчириб ёзиш (плагиат) ҳолатларининг олдини олиш мақсадида уларга биринчи босқичда бевосита тегишли таълим муассасасининг ўз биносида ҳамда иккинчи ва учинчи босқичда ҳудудий адлия органларининг биноларида зарур шароитларни яратиб бериш;

танловнинг ҳар бир босқичини қонунийлик, одиллик, ошкоралик принциплари асосида, шунингдек, уларда манфаатлар тўқнашуви ва коррупцион ҳолатларнинг юзага келмаслигини ҳамда уларнинг ҳар қандай кўринишининг олдини олган ҳолда ўтказилишини таъминлаш;

танловнинг республика босқичи якунлари бўйича учинчи, иккинчи ва биринчи ўринларни эгаллаган иштирокчиларга тақдирлаш маросимида қатнашиш учун етиб келишини таъминлаш;

Ўзбекистон Республикаси Президентининг 2019 йил 9 январдаги ПФ–5618-сон Фармонида асосан танлов билан боғлиқ харажатларни ҳар бир масъул вазирлик ўз сметасига киритган ҳолда ёки ҳомийларни жалб қилган ҳолда амалга ошириш;

мазкур қарор ва у билан тасдиқланган танловни ўтказиш тўғрисидаги низомнинг бошқа барча талабларига қатъий риоя қилиш.

6. Қорақалпоғистон Республикаси Адлия вазирлиги, вилоятлар ва Тошкент шаҳар адлия бошқармалари, Қорақалпоғистон Республикаси Халқ таълими вазирлиги, вилоят халқ таълими бошқармалари, Тошкент шаҳар халқ таълими Бош бошқармаси, шунингдек ҳудудий Ўрта махсус, касб-хунар таълими марказлари ҳамда олий таълим муассасалари ва академик лицей ва коллежлар мазкур қарор доирасида белгиланган вазифаларни ўзларига тегишли ҳудудда ўз вақтида ва тўлиқ бажарилишини таъминласин.

7. Мазкур қарорнинг бажарилишини назорат қилиш адлия вазирининг ўринбосари А. Ташкулов, олий ва ўрта махсус таълим вазири ўринбосари Ш.Бегимкулов ҳамда халқ таълими вазири ўринбосари Д. Кенжаев зиммасига юклансин.

Ўзбекистон Республикаси
адлия вазири


Р. Давлетов

2019 йил “ 5 ” апрель,
1-08/1-577/18-сон



Ўзбекистон Республикаси
олий ва ўрта махсус
таълим вазири


И. Мажидов

2019 йил “ 5 ” апрель,
178/18-сон



Ўзбекистон Республикаси
халқ таълими вазири


Ш. Шерматов

2019 йил “ 08 ” апрель,
18-сон





Адлия вазирлиги, Олий ва ўрта махсус
таълим вазирлиги ва Халқ таълими
вазирлигининг 2019 йил 29 мартдаги
1.08/В-577/8, 174/5 ва 18 -сон қарорига
1-илова

**Ёшларда коррупция ва бошқа ҳуқуқбузарликларга қарши
муросасизлик туйғусини шакллантиришга қаратилган
иншолар танловини ўтказиш тартиби тўғрисида
НИЗОМ**

I боб. Умумий қоидалар

1. Мазкур Низом ёшларнинг ҳуқуқий онги ва ҳуқуқий маданиятини юксалтириш, уларда коррупцияга ва бошқа ҳуқуқбузарликларга нисбатан муросасиз муносабатни шакллантириш, шу жумладан давлат ва жамият ҳаётининг барча соҳаларида коррупциянинг олдини олишга доир чора-тадбирларни амалга ошириш, ёшларда коррупция ва бошқа ҳуқуқбузарликларга қарши тура оладиган кучли иммунитетни шакллантириш мақсадида ташкил этиладиган иншолар танловини (бундан кейинги ўринларда – Танлов деб юритилади) ўтказиш тартибини белгилайди.

2. Танлов ҳар йили анъанавий тарзда сентябрь-декабрь ойларида ўтказилади.

3. Танловни ўтказиш мақсадида Республика ва ҳудудий ташкилий қўмиталар тузилади.

Қуйидагилар ташкилий қўмитанинг вазифалари ҳисобланади:

танловнинг юқори савияда ўтказилишини таъминлашга қаратилган чора-тадбирларни ишлаб чиқиш;

танловни ўтказиш доирасида амалга ошириладиган чора-тадбирларни мувофиқлаштириш;

иншолар учун мавзуларни белгилаш ва тасдиқлаш;

танлов ҳайъатини тузиш ва унинг ишини мувофиқлаштириш;

танлов ҳайъати таркибидан унинг раиси ва котибини сайлаш;

танловнинг юқори савияда ташкил этилишини таъминлаш;

мазкур Низомга кўра, ғолибларни тақдирлаш ва рағбатлантириш билан боғлиқ масалаларни ҳал қилиш.

4. Адлия вазирлигининг Ҳуқуқий тарғибот ва маърифат бошқармаси Республика ташкилий қўмитасининг, Қорақалпоғистон Республикаси Адлия вазирлиги, вилоятлар ва Тошкент шаҳар адлия бошқармаларининг Ҳуқуқий тарғибот ва маърифат бўлимлари эса ҳудудий ташкилий қўмиталарнинг ишчи органи бўлиб ҳисобланади.

II боб. Танловни ўтказиш тартиби

5. Танлов уч босқичда (туман (шаҳар) – вилоят – республика) қуйидаги муддатларда ўтказилади:

биринчи босқич: 18 сентябрь – 8 октябрь (9-16 октябрь – баҳолаш ва натижаларни эълон қилиш);

иккинчи босқич: 20 октябрь – 6 ноябрь (7-11 ноябрь – баҳолаш ва натижаларни эълон қилиш);

учинчи босқич: 14 ноябрь – 22 ноябрь (23-30 ноябрь – баҳолаш ва натижаларни эълон қилиш).

Агар юқоридаги босқичлардан бирида унинг охириги кун(лар)и дам олиш санасига (шанба, якшанба ёки байрам) тўғри келганда танловга тегишли хужжатлар ушбу кун(лар)га қадар қабул қилинади.

6. Танлов икки гуруҳ кесимида ўтказилади:

биринчи гуруҳ – умумий ўрта таълим мактабларининг 8–11 синфлари ҳамда лицей ва коллеж ўқувчилари ўртасида;

иккинчи гуруҳ – олий таълим муассасалари талабалари ўртасида.

7. Танловни ўтказишда қуйидагилар масъул ҳисобланади:

мактаб ҳамда лицей ва коллеж ўқувчилари ўртасида:

биринчи босқич учун туман (шаҳар) адлия ва халқ таълими бўлимлари ҳамда академик лицей ва коллежлар (худудда мавжуд бўлган тақдирда);

иккинчи босқич учун Қорақалпоғистон Республикаси Адлия вазирлиги, вилоятлар ва Тошкент шаҳар адлия бошқармалари, Қорақалпоғистон Республикаси Халқ таълими вазирлиги, Тошкент шаҳар халқ таълими Бош бошқармаси, вилоятлар халқ таълими бошқармалари, шунингдек худудий Касб-хунар таълими марказлари.

олий таълим муассасалари талабалари ўртасида:

биринчи босқич учун тегишли олий таълим муассасаси;

иккинчи босқич учун Қорақалпоғистон Республикаси Адлия вазирлиги, вилоятлар ва Тошкент шаҳар адлия бошқармалари.

8. Республика ташкилий қўмитаси томонидан ҳам биринчи, ҳам иккинчи гуруҳга биринчи, иккинчи ва учинчи босқичнинг ҳар бирига мўлжалланган алоҳида уч хил номдаги иншолар мавзуси танланади ҳамда улар белгиланган муддатларда ОАВ ва ижтимоий тармоқлар орқали барчага маълум қилиб борилади.

9. Иштирокчилар ушбу мавзулар ичидан бевосита ўзлари битта мавзунини танлаган ҳолда тегишли босқич учун ўз иншосини ёзишади ҳамда белгиланган тартибда тегишли танлов ҳайъатига тақдим этишади.

10. Танловнинг биринчи гуруҳи учун номзодлар ўз ижодий ишларини ота-онаси ёки ўқитувчиси номидан кузатув хати (унда иштирокчи ва ота-она ёки ўқитувчи ҳақида маълумот ҳамда алоқа маълумотлари кўрсатилади) билан бирга, иккинчи гуруҳ эса ўзи ҳақидаги маълумотнома (объективка) билан бирга топширадилар.

Маълумотномада алоқа маълумотлари (e-mail, телефон рақами, манзил) кўрсатилган бўлиши керак.

11. Биринчи гуруҳ доирасида:

ҳар бир босқичда учтадан ғолиб кейинги босқичга ўтказилади;

иккинчи босқич якунлари бўйича ушбу гуруҳдан Республика босқичига Қорақалпоғистон Республикаси, Тошкент шаҳри ва ҳар бир вилоятдан учтадан, жами 42 нафар иштирокчи етиб келади.

12. Иккинчи гуруҳ доирасида:

биринчи босқичда тегишли худуддаги мавжуд олий таълим муассасаларидан учтадан, агар ушбу худудда фақатгина битта олий таълим муассасаси фаолият юритаётган тақдирда камида олтига ғолиб кейинги босқичга ўтказилади;

иккинчи босқич якунлари бўйича ушбу гуруҳдан Республика босқичига Қорақалпоғистон Республикаси, Тошкент шаҳри ва ҳар бир вилоятдан учтадан, жами 42 нафар иштирокчи етиб келади.

Республика босқичида ҳар бир гуруҳдан учинчи, иккинчи ва биринчи ўринлар бўйича жами 6 нафар ғолиблар танловнинг республика ҳайъати томонидан аниқланади.

III боб. Танлов ғолибларини аниқлаш

13. Ташкилий кўмита томонидан танловнинг республика босқичига етиб келган иштирокчилар ўртасидан ғолибларни аниқлаш мақсадида Ўзбекистон Республикаси Адлия вазирлиги, Олий ва ўрта махсус таълим вазирлиги ҳамда Халқ таълими вазирлигининг камида икки нафар мутахассисидан иборат камида 6 кишилик таркибда танловнинг республика ҳайъати тузилади.

Худди шунингдек, биринчи ва иккинчи босқичдаги иштирокчилар орасидан ғолибларни аниқлаш мақсадида ҳам ҳар бир гуруҳ учун масъул ташкилотлар вакилларида иборат таркибда танловнинг ҳудудий ҳайъатлари тузилади.

14. Ҳудудий ҳайъатлар биринчи босқичда келиб тушган иншоларни 9-16 октябрь кунлари ҳамда иккинчи босқичдаги иншоларни эса 7-11 ноябрь кунлари кўриб чиқади ва номзодлар орасидан кейинги босқич учун ғолибларни аниқлайди ҳамда бу тўғрисида қарор қабул қилади.

Республика ҳайъати иккинчи босқич натижалари бўйича учинчи босқичга етиб келган иштирокчиларнинг иншоларини 23-30 ноябрь кунлари давомида кўриб чиқиб, улар орасидан ҳар бир гуруҳ бўйича учинчи, иккинчи ва биринчи ўрин соҳибларини аниқлаши ҳамда бу тўғрисида қарор қабул қилиши лозим.

15. Танлов ҳайъатининг қарори очиқ овоз бериш орқали кўпчилик овоз билан қабул қилинади. Овозлар тенг бўлиб қолган тақдирда ҳайъат раисининг овози ҳал қилувчи ҳисобланади.

16. Танлов натижалари баённома билан расмийлаштирилади. Баённома барча ҳайъат аъзолари томонидан имзоланади.

17. Биринчи босқич якунлари бўйича қабул қилинган ҳайъат қароридан норози бўлган тақдирда 17-18 октябрь кунлари давомида қарорнинг устидан иккинчи босқич бўйича тузилган тегишли ҳайъатга мурожаат қилиниши мумкин.

Бунда ушбу ҳайъат томонидан тегишли мурожаат 19 октябрь кунига қадар қайта кўриб чиқилиши ва қарор қабул қилиниши ҳамда натижаси ҳақида ҳудудий ишчи органи орқали мурожаатчига маълум қилиниши лозим.

18. Иккинчи босқич якунлари бўйича қабул қилинган ҳайъат қароридан норози бўлган тақдирда 12-13 ноябрь кунлари давомида қарорнинг устидан республика ҳайъатига мурожаат қилиниши мумкин.

Бунда ушбу ҳайъат томонидан тегишли мурожаат 14 ноябрь кунига қадар қайта кўриб чиқилиши ва қарор қабул қилиниши ҳамда натижаси ҳақида республика ишчи органи орқали мурожаатчига маълум қилиниши лозим.

19. Республика танлов ҳайъати томонидан учинчи босқич натижалари бўйича қабул қилинган қарор муҳокама қилинмайди.

IV боб. Танлов ғолибларини тақдирлаш

20. Танлов ғолибларини тақдирлаш ҳақидаги маълумот Ўзбекистон Республикаси Адлия вазирлиги, Олий ва ўрта махсус таълим вазирлиги ҳамда Халқ таълими вазирлигининг расмий веб-сайтларида эълон қилинади.

Тегисли номинация бўйича ғолиб бўлган номзод шахсан хабардор қилинади.

21. Танловнинг ҳар бир гуруҳи бўйича ғолибларни тақдирлаш учун совғалар танлов бошланишидан олдин Республика ташкилий қўмитаси томонидан белгиланади ва тасдиқланиди.

Ҳар бир ўрин учун тасдиқланган совғалар ҳақидаги маълумот Республика ишчи органи томонидан ОАВ ва ижтимоий тармоқлар орқали маълум қилинади.

22. Ғолибларнинг дипломлари Ўзбекистон Республикаси Адлия вазирлиги, Олий ва ўрта махсус таълим вазирлиги ҳамда Халқ таълими вазирлиги раҳбарлари томонидан имзоланади.

23. Танлов натижаларини эълон қилиш ҳамда ғолибларни тақдирлаш қоида тариқасида Конституция куни ҳамда “9 декабрь – Халқаро коррупцияга қарши кураш куни” арафасида танлов ҳайъати аъзолари, иштирокчилар, ижодий жамоатчилик, оммавий ахборот воситалари вакиллари таклиф қилинган ҳолда амалга оширилади.

24. Ғолибларга ва бошқа иштирокчиларга ҳомийлар томонидан таъсис этиладиган бошқа қимматбаҳо совғалар ҳам берилиши мумкин.

Танлов ғолиблари ва совриндорлари матбуотда эълон қилинади.

VI боб. Яқуний қоидалар

25. Танловни ўтказиш ва ғолибларни тақдирлаш билан боғлиқ барча харажатлар Ўзбекистон Республикаси Адлия вазирлиги, Олий ва ўрта махсус таълим вазирлиги ҳамда Халқ таълими вазирлиги ҳамда ҳомийларнинг маблағлари ҳисобидан белгиланган тартибда қопланади.

26. Номзодлар томонидан танловда иштирок этиш учун тақдим этилган материаллар бўйича изоҳ ёки шарҳ берилмайди ва улар эгаларига қайтарилмайди.

27. Танлов иштирокчиларининг танловларда ҳамда тақдирлаш маросимида иштирок этиш билан боғлиқ харажатлари уларнинг ўз маблағлари ҳисобидан амалга оширилади.

Адлия вазирлиги, Олий ва ўрта махсус
таълим вазирлиги ва Халқ таълими
вазирлигининг 2019 йил 29 мартдаги
_____, _____ ва _____-сон қарорига
2-илова

**Ёшларда коррупция ва бошқа ҳуқуқбузарликларга қарши
мурасизлик туйғусини шакллантиришга қаратилган
иншолар танловининг Республика ташкилий қўмитаси
ТАРКИБИ**

1. **Ташкулов Акбар Джурабоевич** - Ўзбекистон Республикаси адлия вазири ўринбосари, *ташкилий қўмита раиси*
2. **Бегимкулов Узоқбой
Шоимкулович** - Ўзбекистон Республикаси олий ва ўрта махсус таълим вазири ўринбосари, *раис ўринбосари*
3. **Дилшод Кенжаев Муталибович** - Ўзбекистон Республикаси халқ таълими вазири ўринбосари, *раис ўринбосари*
4. **Рабиев Шерзад Миржалилович** - Адлия вазирлигининг Ҳуқуқий тарғибот ва маърифат бошқармаси бошлиғи
5. **Хакимов Зафар Туляганович** - Олий ва ўрта махсус, касб-хунар таълимини ривожлантириш маркази директори
6. **Жўраев Ўткир Ортиқбоевич** - Халқ таълими вазирлиги тасарруфидаги Республика таълим маркази бўлим бошлиғи
7. **Кличев Хаётжон Одилович** - Адлия вазирлигининг Ҳуқуқий тарғибот ва маърифат бошқармасининг бўлим бошлиғи, *масъул котиб*

Изох. Ташкилий қўмита аъзолари бошқа ишга ўтган тақдирда унинг таркибига ушбу лавозимларга янгидан тайинланган шахслар ёхуд тегишли функциялар юкланган шахслар киритилади.

Адлия вазирлиги, Олий ва ўрта махсус
таълим вазирлиги ва Халқ таълими
вазирлигининг 2019 йил 29 мартдаги
_____, _____ ва _____-сон қарорига
3-илова

**Ёшларда коррупция ва бошқа ҳуқуқбузарликларга қарши
мурасизлик туйғусини шакллантиришга қаратилган
иншолар танловининг ҳудудий ташкилий қўмитаси
НАМУНАВИЙ ТАРКИБИ**

1. _____ - Қорақалпоғистон Республикаси Адлия вазирлиги,
вилоятлар ва Тошкент шаҳар адлия бошқармалари
раҳбарининг биринчи ўринбосари, *ташкилий
қўмита раиси*
2. _____ - Ҳудудий Ўрта махсус, касб-хунар таълими маркази
раҳбарининг ўринбосари, *раис ўринбосари*
3. _____ - Қорақалпоғистон Республикаси Халқ таълими
вазирлиги, вилоят халқ таълими бошқармалари
ва Тошкент шаҳар халқ таълими Бош бошқармаси
раҳбарининг ўринбосари, *раис ўринбосари*
4. _____ - Ҳудудий Ўрта махсус, касб-хунар таълими маркази
масъул ходими
5. _____ - Қорақалпоғистон Республикаси Халқ таълими
вазирлиги, вилоят халқ таълими бошқармалари
ва Тошкент шаҳар халқ таълими бош бошқармаси
масъул ходими
6. _____ - Қорақалпоғистон Республикаси Адлия вазирлиги,
вилоятлар ва Тошкент шаҳар адлия бошқармалари
Ҳуқуқий тарғибот ва маърифат бўлими бошлиғи,
масъул котиб

Изоҳ. Ташкилий қўмита аъзолари бошқа ишга ўтган тақдирда унинг таркибига ушбу лавозимларга янгидан тайинланган шахслар ёхуд тегишли функциялар юкланган шахслар киритилади.